

VENDIM
Nr. 42, datë 5.10.2023

**PËR REFUZIMIN E APLIKIMIT TË SHOQËRISË RAJONALE UJËSJELLËS-
KANALIZIME ELBASAN SHA PËR NDRYSHIMIN E NIVELIT TARIFOR**

Në mbështetje të neneve 13, 14, 21 dhe 22, të ligjit nr. 8102, datë 28.3.1996, “Për kuadrin rregullator të sektorit të furnizimit me ujë dhe largimit e përpunimit të ujërave të ndotura”, i ndryshuar (ligji nr. 8102), dhe neneve 8, 10, 13, të vendimit të Komisionit Kombëtar Rregullator nr. 539, datë 30.12.2021, “Për miratimin e metodologjisë dhe procedurës për miratimin e tarifave të shërbimeve ujësjellës-kanalizime” (vendimi i KKRR-së nr. 539), vendimit të KKRR-së nr. 32, datë 13.9.2023, “Për një ndryshim në vendimin e KKRR-së nr. 28, datë 23.6.2023, “Për shtyrje afati të aplikimit nga shoqëritë Ujësjellës-Kanalizime për tarifa të ujit të pijshëm dhe ujërave të ndotura për vitin 2023” (vendimi i KKRR-së nr. 32),

KOMISIONI KOMBËTAR RREGULLATOR,

në mbledhjen e datës 5.10.2023, pasi shqyrtoi dokumentacionin e paraqitur nga Drejtoria Tekniko-Ekonomike dhe Drejtoria Juridike dhe Konsumatorit mbi kërkesën e Shoqërisë Rajonale Ujësjellës-Kanalizime Elbasan sh.a. për ndryshimin e nivelit tarifor për shërbimin e furnizimit me ujë dhe largimit të ujërave të ndotura,

KONSTATOI SE:

1. Shoqëria Rajonale Ujësjellës-Kanalizime Elbasan sh.a. është licencuar me vendimin e KKRR-së nr. 16, datë 28.4.2023, “Për licencimin e Shoqërisë Rajonale Ujësjellës-Kanalizime Elbasan sh.a.”, për grumbullimin dhe shpërndarjen e ujit për konsum publik dhe largimin e ujërave të ndotura.

2. Shoqëria Rajonale Ujësjellës-Kanalizime Elbasan sh.a. ka aplikuar pranë ERRU-së, me shkresën nr. 2477 prot., datë 29.9.2023, me lëndë: “Kërkesë për unifikim tarifash për tarifatat fikse, tarifatat volumetrike për shërbimin e furnizimit me ujë të pijshëm dhe largimin e ujërave të ndotura për klientët e Shoqërisë Rajonale Ujësjellës-Kanalizime Elbasan sh.a.”, protokolluar me tonën nr. 336, datë 29.9.2023.

3. Bazuar në pikën 1, neni 10, i vendimit të KKRR-së nr. 539, datë 30.12.2021, “Për miratimin e metodologjisë dhe procedurës për miratimin e tarifave të shërbimeve ujësjellës-kanalizime”, aplikimi për ndryshimin e nivelit tarifor nga shoqëria pranë ERRU-së duhet të përmbajë dokumentacionin e mëposhtëm:

a) kërkesa zyrtare drejtuar ERRU-së për ndryshimin e tarifave për shërbimet ujësjellës, kanalizime, dhe ITUN;

b) pasqyrat financiare të vitit paraardhës certifikuar nga një ekspert kontabël i autorizuar;

c) Plani 5-vjeçar i Biznesit, ku të paraqitet edhe programi i investimeve dhe aseteve të reja, i cili do të hartohet në përputhje me formatin e aprovuar në këtë metodologji nga ERRU-ja, që është i detyrueshëm vetëm për grupin e shoqërive që tentojnë të mbulojnë 100% të kostove totale;

d) modeli i aplikimit për nivelin e ri tarifor. Të gjitha tabelat e modelit paraqiten të printuara dhe të firmosura nga shoqëria dhe sipas formatit Excel të miratuar nga ERRU-ja;

e) organigramë dhe përshkrimet e punës së stafit sipas pozicionit të tyre;

f) aktmarrëveshjet e kredisë midis shoqërisë dhe institucioneve kredidhënëse, në rast se shoqëria është financuar me hua dhe skema e planit mujor të shlyerjeve gjatë viteve të kaluara dhe viteve të ardhshme;

g) mendimin e pushtetit vendor për tarifën e propozuara, të shprehura në vendimin përkatës dhe konfirmuar nga prefekti i qarkut për legjitimitetin e tij;

h) vendimi i Këshillit të Administrimit për miratimin e tarifave të propozuara;

i) procesverbali i Seancave Dëgjimore me Publikun, sipas formatit të përcaktuar nga ERRU-ja;

j) subvencionet e përfituara nga operatori dhe ato të nevojshme gjatë periudhës rregullatore të tarifave të propozuara;

k) lejet ose autorizimet për përdorimin e ujit për shoqëritë UK lëshuar nga Këshilli i Basenit Ujor të shoqëruara me Marrëveshjen ndërmjet shoqërisë UK dhe KBU-së për pagesën e tarifave për përdorimin e ujit në përputhje me VKM-në nr. 662, 2016, “Mbi tarifën e përdorimit të ujit”;

l) raport i detajuar për gjendjen teknike të sistemeve të furnizimit me ujë dhe kanalizimeve të ujërave të ndotura, në të cilën të përshkruhet inventari i aseteve në përdorim të shoqërisë me të dhëna teknike (përmasat, lloji i materialit, viti të instalimit/ndërtimit), përfshirë dhe prioritetet për zëvendësimin e tyre. Ky material do të hartohet sipas formatit të përcaktuar nga ERRU-ja;

m) relacion analitik-ekonomik për vitin paraardhës, si dhe për periudhën rregullatore që kërkohet ndryshimi i tarifave, në të cilën shprehet qartë justifikimi dhe argumentet përkatëse dhe objektivat e shoqërisë për përmirësimin e treguesve të punës;

n) në rast se shoqëria aplikon për tarifë shitje uji me shumicë, në kërkesën e saj për tarifë duhet të paraqesë: relacion teknik dhe ekonomik me llogaritjet e tarifës së shitjes së ujit me shumicë, miratimin e tarifës së kërkuar nga organet drejtuese, si dhe aktmarrëveshjet midis palëve shitëse-bleëse;

o) të ketë shlyer detyrimet për pagesën rregullatore sipas kontratës së nënshkruar midis ERRU-së dhe shoqërisë dhe në rast të detyrimeve të prapambetura të ketë shlyer sipas marrëveshjes së nënshkruar mes tyre për shlyerjen me këste të tyre;

p) deklarata për vërtetësinë dhe saktësinë e të dhënave sipas nenit 26 dhe nenit 46 të kësaj metodologjie.

4. Nga shqyrtimi i dokumentacionit të paraqitur nga Shoqëria Rajonale Ujësjellës-Kanalizime Elbasan sh.a. evidentohet se mungojnë këto dokumente:

a) mendimi i pushtetit vendor për tarifën e propozuara të shprehura në vendimin përkatës dhe konfirmuar nga prefekti i qarkut për legjitimitetin e tij;

b) procesverbali i zhvillimit të Seancave Dëgjimore me Publikun;

c) subvencionet e përfituara nga operatori dhe ato të nevojshme gjatë periudhës rregullatore të tarifave të propozuara;

d) lejet ose autorizimet për përdorimin e ujit për shoqëritë UK lëshuar nga Këshilli i Basenit Ujor të shoqëruara me Marrëveshjen ndërmjet shoqërisë UK dhe KBU-së;

e) përshkrimet e punës së stafit sipas pozicionit të tyre për secilën UK dhe për shoqërinë SKP;

5. Gjithashtu u evidentuan këto problematika në dokumentacionin shkresor të paraqitur:

- Plani i Biznesit 5-vjeçar nuk është i shoqëruar me vendim të miratuar nga Këshilli Mbikëqyrës apo Asambleja e Aksionarëve;

- raport i gjendjes teknike të sistemeve të furnizimit me ujë dhe kanalizimeve të ujërave të ndotura është paraqitur në formë tabelare dhe mungon relacioni shpjegues sipas formatit të miratuar nga ERRU-ja;

- pasqyrat financiare për vitin 2022 për UK Librazhd janë të pafirmosura dhe të pavulosura;

Shoqëria Rajonale Ujësjellës-Kanalizime Elbasan sh.a. nuk e ka zhvilluar seancën dëgjimore me publikun në respektim të pikës 1, të nenit 13 “Procedura dhe afatet e miratimit të tarifave”, të

vendimit të KKRR-së nr. 539, datë 30.12.2021, “Për miratimin e metodologjisë dhe procedurës për miratimin e tarifave të shërbimeve ujësjellës-kanalizime”.

Shoqëria Rajonale Ujësjellës-Kanalizime Elbasan sh.a. nuk ka respektuar aktmarrëveshjen e nënshkruar me ERRU-në për shlyerjen e detyrimeve të prapambetura.

Për gjithë sa më sipër, Komisioni Kombëtar Rregullator, pasi arriti në përfundimin se aplikimi i Shoqërisë Rajonale UK Elbasan sh.a. nuk plotëson parashikimin e pikës 2, të nenit 10, të vendimit nr. 539, “Për miratimin e metodologjisë dhe procedurës për miratimin e tarifave të shërbimeve ujësjellës-kanalizime”,

VENDOSI:

1. Të refuzojë aplikimin e Shoqërisë Rajonale Ujësjellës-Kanalizime Elbasan për ndryshimin e nivelit tarifar për shërbimin e furnizimit me ujë dhe kanalizime.

2. Drejtoria Tekniko-Ekonomike ngarkohet të njoftojë Shoqërinë Rajonale Ujësjellës-Kanalizime Elbasan për vendimin e Komisionit Kombëtar Rregullator.

3. Ky vendim hyn në fuqi menjëherë.

Ky vendim botohet në Fletoren Zyrtare.

KRYETAR
Ndriçim Shani